

Vunzcaiz Sonsaw Cuengh Gun Song Vah Saw Baetnieb Bae Guhhong

壮汉双语教育人才扬帆起航

—Guengjsae Gaiq Daeuz Siujyoz Gyauyuz Ciennieb Ban Cuengh Gun Song Vah Saw Baetnieb Vanjvei Banh Baenz

□ bonibauq gicej Couh Yi/周玉 Cau Dwzfeih/赵德飞



▲ Hagseng biujyenj diuq fouxsaux.

▲ Yienhciengz bouxyawj lai dahraix.

◀ Habciengq fwen gingqlaeuj.

6 nyied 22 hauh banhaemh, Guengjsae gaiq daeuz siujyoz gyauyuz ciennieb Cuengh Gun song vah saw baetnieb vanjvei youq Guengjsae Swhfan Yozyen Cangzgangh Yaugih banh. Guengjsae Swhfan Yozyen fuyaucangj Lij Yangjci, Swcigih Minzyijvej fucujyin Veih Yungj-hungz, Swcigih Gyauyuzdingh Minzgyaucu cucangj Veiz Lanzmingz daengj camgya caemhcai yawj le baetnieb vanjvei.

Vanjvei hainduj seiz, Veih Yungjhungz gangjvah cukhoh gyoengq hagseng gaiq daeuz Cuengh Gun song vah saw swnhleih baetnieb, de maqmuengh Guengjsae Swhfan Yozyen gaemndeiz seizndeiz neix, cungjgez gingniemh, fatyengz cing-cik, coglaeng aeu ban Cuengh Gun song vah saw banh ndaej yied daeuj yied ndei, vih ndawbiengz son' gyaug engq lai habgek lauxsae caeuj vunzcaiz, vanzlij naeuz hagseng baetnieb gaenxmaenx vih Cuengh

Gun song vah saw gyauyuz guh gungyen, yungh gij cihsiz bonjfaenh youq hagdangz seiz hag ndaej haenx bauqdap ndawbiengz, bauqdap Mbanjcuengh,

Veiz Lanzmingz doiq hagseng baetnieb yaek bae gak dieg son Cuengh Gun song vah saw haenx daezok geij diemj maqmuengh: Giendingh saenqniemh caeuj lij-siengj mbouj doenghngauz, giendingh saenqsim caeuj gietsim guh hong Cuengh Gun song saw giekdaej sonhag; laebdaeb hagsib, baujci gaenx hag, giengzvaq Cuengh Gun song vah saw gyauyuz sonhag suijsingz; caenhvaiq sibgvenq guh hong, gaemmaenh sonhag saedhengz bonjsaeh, vih son' gyaug vunzcaiz saujsu minzcuz guh gungyen.

Baetnieb vanjvei seiz, gyoengq yenjyenz daiqbiuj 78 boux hagseng baetnieb gaiq daeuz ban Cuengh Gun song vah saw hwnjdaiz biujyenj haenx, doenggyaq gangj Vahcuengh,

eu fwen, diuq foux Bouxcuengh, yungh Vahcuengh yienj heiq bonjsaw Sawcuengh daengj hingzsik, baijyenj le gij cingsaenz yienghsienq hagseng gaiq daeuz ban Cuengh Gun song vah saw gaenxmaenx doxhwnj, canghfwen Vahcuengh Luz Cwngsin miz aen cwngheuh "Daegsaenq Mbanjcuengh" haenx hix daeuj camgya vanjvei, yienjciengq go Vahcuengh.

Hagseng camgya baez vanjvei neix dwg hagseng gaiq daeuz ban Cuengh Gun song vah saw Guengjsae Swhfan Yozyen Codaengj Gyauyuz Yozyen 2014 nienz hailaeb ciusou conhgoh siujyoz gyauyuz (Cuengh Gun song vah saw fuengyiengq) ciennieb haenx. Ciuq cam rox, daj bineix hwnj, aen ciennieb neix yaek gaij baenz 3 bi lo, yaek laebdaeb vih gih raeuz son' gyaug engq lai vunzcaiz Cuengh Gun song vah saw, mboujduenh gyalai gij lauxsae ligliengh Cuengh Gun song vah saw gyauyuz gih raeuz.



▲ Soengq aendomq hawj bouxhek daeuj yawj biujyenj.



▲ Bouxyawj ingj aeu siengq bouxbiujyenj.



◀ Song boux hagseng Gvangsiah Minzcuz Dayoz hix daeuj biujyenj cezmu.

► Dou baetnieb lo.

◀ Bouxcujci daenj buhvaq gig miz daegsaek.

